



**Կարգապահական գործ թիվ ԿԳ-16003**

Հայաստանի Հանրապետության փաստաբանների պալատի խորհրդի  
2016 թվականի մարտի 09-ի թիվ 65-րդ նիստի

**Ո Ր Ո Շ ՈՒ Մ ԹԻՎ ԿԳ/55-Ա**

**ՓԱՍՏԱՔԱՆ ԱՐՏԱՎԱԶԴ ՓԱՐՍԱԴԱՆՅԱՆԻՆ ԿԱՐԳԱՊԱՀԱԿԱՆ  
ՊԱՏԱՍԽԱՆԱՏՎՈՒԹՅԱՆ ԵՆԹԱՐԿԵԼՈՒ ՀԱՐՑԸ ՔՆՆԵԼՈՒ ՄԱՍԻՆ**  
(ՎԵՐԱՊԱՏՐԱՍՏՄԱՆ ԴԱՍԸՆԹԱՑՆԵՐԻ ԳՈՐԾՈՎ)

Հայաստանի Հանրապետության փաստաբանների պալատի (**այսուհետ նաև՝ Պալատ**) խորհուրդը (**այսուհետ նաև՝ խորհուրդ**), նիստը նախագահող՝ Նելլի Հարությունյանի, **խորհրդի անդամներ՝** Կարապետ Աղաջանյանի, Մելանյա Առուստամյանի, Սիմոն Բաբայանի, Կարեն Մեժլումյանի, Լուսինե Սահակյանի, Լիպարիտ Սիմոնյանի և Մարտուն Փանոսյանի կազմով,  
քարտուղարությամբ Նոննա Համբարձումյանի,  
քննության առնելով փաստաբան Արտավազդ Փարսադանյանին (արտոնագիր թիվ 226) կարգապահական պատասխանատվության ենթարկելու վերաբերյալ հարցը

### **Պ Ա Ր Զ Ե Ց՝**

#### **1. Կարգապահական վարույթ հարուցելու առիթը և հիմքը.**

«Հայաստանի Հանրապետության փաստաբանական դպրոց» հիմնադրամի (այսուհետ՝ Դպրոց) կողմից 22.01.2016թ. ներկայացված տեղեկանքի համաձայն՝ փաստաբան Արտավազդ Փարսադանյանը (արտոնագիր թիվ 226) 2015թ. երկրորդ կիսամյակի (հուլիսից դեկտեմբեր (ներառյալ)) ընթացքում չի մասնակցել պարտադիր վերապատրաստման դասընթացներին և չի լրացրել պարտադիր վերապատրաստման որևէ ժամ:

#### **2. Կարգապահական վարույթ հարուցելու մասին որոշումը.**

ՀՀ փաստաբանների պալատի նախագահի առաջին տեղակալի 25.01.2016թ. թիվ 14-Ա/ԿԳ-16003 որոշմամբ կարգապահական վարույթ է հարուցվել փաստաբան Արտավազդ Փարսադանյանի նկատմամբ՝ «Փաստաբանության մասին» ՀՀ օրենքի 19-րդ հոդվածի 1-ին մասի 4.1 կետի, 45.12-րդ հոդվածի 2-րդ մասի և Պալատի ընդհանուր ժողովի կողմից 11.02.2012թ. թիվ 1/4-Լ որոշմամբ հաստատված Փաստաբանի վարքագծի կանոնագրքի (**այսուհետ՝ Կանոնագիրք**) 2.8.2 կետի խախտման հատկանիշներով:

29.01.2016թ-ին կարգապահական գործը հանձնվել է Պալատի խորհրդին:

Խորհրդի նիստը տեղի է ունեցել 2016 թվականի մարտի 09-ին, ժամը՝ 18:33-ին, ՀՀ փաստաբանների պալատի վարչական շենքում (ք.Երևան, Զաքիյան 2, 4-րդ հարկ, թիվ 12 սենյակ):

### **3. Պատասխանողի համառոտ բացատրությունը.**

Փաստաբան Արտավազդ Փարսադանյանը 02.02.2016թ. գրավոր դիմումով հայտնել է, որ իրեն չեն չիրագեցել, որ դասընթացներին պետք է մասնակցի 6 ամսվա ընթացքում: Հայտնել է, որ դիմել է Դպրոց դասընթացներին մասնակցելու համար, խնդրել է կարգապահական գործի վարույթը կարճել:

### **4. Գործի հանգամանքները՝ առկա ապացույցների վկայակոչմամբ.**

Պալատի խորհուրդը՝ ուսումնասիրելով գործում առկա գրավոր փաստաթղթերը, հաստատված է համարում հետևյալ փաստերը.

**1) 2015թ. երկրորդ կիսամյակի (հուլիս-դեկտեմբեր (ներառյալ)) ընթացքում Պալատի, Դպրոցի և Պալատի կողմից սահմանված կարգով հավաքարմագրված կազմակերպությունների կողմից կազմակերպվել է 98 (իննսունութ) վերապատրաստման դասընթաց:**

Նշված փաստը հաստատվում է Պալատի վերապատրաստման հարցերով համակարգողի 09.03.2016թ. տեղեկանքով:

**2) Փաստաբան Արտավազդ Փարսադանյանը 2015թ. հուլիս-դեկտեմբեր (ներառյալ) ամիսներին չի մասնակցել պարտադիր վերապատրաստման դասընթացներին և չի լրացրել պարտադիր վերապատրաստման որևէ ժամ:**

Նշված փաստը հաստատվում է Դպրոցի 22.01.2016թ. տեղեկանքով, Պատասխանողի բացատրությամբ:

**3) Փաստաբան Արտավազդ Փարսադանյանի նկատմամբ սահմանված կարգով և ժամաքանակով վերապատրաստման դասընթացներին չմասնակցելու հիմքով կարգապահական վարույթ հարուցվել է երկրորդ անգամ:**

Նշված փաստը հաստատվում է Պալատի ընդհանուր դեպարտամենտի ղեկավարի կողմից 09.03.2016թ. տրամադրված N ԸԴՂ/ԿԳ/243-16 տեղեկանքով:

### **5. Պատասխանողի անձը բնութագրող հանգամանքները.**

Պալատի ընդհանուր դեպարտամենտի ղեկավարի կողմից 09.03.2016թ. տրամադրված տեղեկանքի համաձայն՝ փաստաբան Արտավազդ Փարսադանյանի (արտոնագիր 226, ստացած՝ 15.11.1990թ.) նկատմամբ 2006-2016թթ. ընկած ժամանակահատվածում վերապատրաստման դասընթացներին չմասնակցելու հիմքով հարուցվել է կարգապահական վարույթ, որը Խորհրդի 11.12.2015թ. թիվ ԿԳ/186-Ա որոշմամբ կարճվել է՝ արտոնություն կիրառելու հիմքով:

### **6. Պալատի խորհրդի պատճառաբանված եզրակացությունը և որոշումը.**

**Հիմք ընդունելով Պալատի խորհրդի կողմից հաստատված փաստերը, դրանք հիմնավորող գործում առկա ապացույցները և քննարկվող իրավահարաբերությունները կարգավորող կանոնները, Պալատի խորհուրդը գտնում է, որ փաստաբան Արտավազդ Փարսադանյանին պետք է ենթարկել կարգապահական պատասխանատվության՝ հետևյալ պատճառաբանությամբ.**

Փաստաբանների վերապատրաստման հետ կապված հարաբերությունները կարգավորվում են «Փաստաբանության մասին» ՀՀ օրենքի, Հայաստանի Հանրապետության փաստաբանների պալատի կանոնադրության, Փաստաբանի վարքագծի կանոնագրքի և Պալատի խորհրդի 18.12.2014թ. թիվ 35/8-Լ որոշմամբ

նոր խմբագրությամբ հաստատված «Փաստաբանների վերապատրաստման» կարգի (**այսուհետ՝ Կարգ**) դրույթներով:

«Փաստաբանության մասին» ՀՀ օրենքի 19-րդ հոդվածի 1-ին մասի 4.1 կետի համաձայն՝ փաստաբանը պարտավոր է՝ ... 4.1) սահմանված կարգով և ժամաքանակով մասնակցել սույն օրենքով նախատեսված վերապատրաստման դասընթացներին:

«Փաստաբանության մասին» ՀՀ օրենքի 45.12-րդ հոդվածի 2-րդ մասի համաձայն՝ փաստաբանը պարտավոր է անցնել փաստաբանների պալատի խորհրդի սահմանած կարգով և ժամաքանակով վերապատրաստման դասընթացներ, որոնք չեն կարող երկու տարվա ընթացքում քառասունույթ ժամից պակաս լինել:

Հայաստանի Հանրապետության փաստաբանների պալատի կանոնադրության 16.5 կետի 24-րդ ենթակետի համաձայն՝ Պալատի խորհուրդը, որպես գործադիր մարմին հաստատում է փաստաբանների վերապատրաստման կարգը:

Կանոնագրքի 2.8.2 ենթակետը սահմանում է, որ փաստաբանը պարտավոր է Պալատի խորհրդի կողմից սահմանված կարգով և ժամաքանակով մասնակցել Օրենքով նախատեսված վերապատրաստման դասընթացներին:

Կարգի 1-ին կետի համաձայն՝ կարգը սահմանում է փաստաբանների վերապատրաստման դասընթացներ անցնելու ընթացակարգը, ժամկետները, ժամերի հաշվարկը, պատասխանատվության, հաշվետվողականության, ինչպես նաև վերապատրաստման հետ կապված այլ հարաբերությունները:

Կարգի 8-րդ կետի համաձայն՝ յուրաքանչյուր կիսամյակի (վեց ամսվա) համար փաստաբանը՝ Կարգով նախատեսված ժամկետում և ընթացակարգով, պետք է անցնի 12 (տասներկու) ակադեմիական ժամ (այսուհետ՝ ժամ, 1 (մեկ) ակադեմիական ժամը հավասար է 40 (քառասուն) րոպեի) վերապատրաստում: Կիսամյակի հաշվարկը՝ ա) սկսվում է հունվար ամսից և ավարտվում հունիսին (ներառյալ), կամ բ) սկսվում է հուլիս ամսից և ավարտվում դեկտեմբերին (ներառյալ):

Կարգի 27-րդ կետի համաձայն՝ կարգը խախտելու համար փաստաբանը ենթակա է կարգապահական պատասխանատվության՝ «Փաստաբանության մասին» Հայաստանի Հանրապետության օրենքով և Փաստաբանի վարքագծի կանոնագրքով սահմանված կարգով:

Պալատի խորհրդի՝ «ՀՀ փաստաբանների պալատի խորհրդի 18.12.2014թ. թիվ 35/8-Լ որոշմամբ նոր խմբագրությամբ հաստատված «Փաստաբանների վերապատրաստման» կարգում լրացումներ կատարելու հարցը քննարկելու մասին» 29.10.2015թ. թիվ 28/8-Լ որոշմամբ (**այսուհետ՝ Որոշում**)՝ Կարգը լրացվել է 30.<sup>1</sup> կետով, համաձայն որի՝ եթե փաստաբանը գրավոր դիմում (այդ թվում՝ էլեկտրոնային փոստի միջոցով) է ներկայացնում Պալատին՝ պարտավորվելով հաշվետու կիսամյակում չանցած վերապատրաստման դասընթացների ժամերն իր հաշվին անցնել հաջորդ կիսամյակում, ապա՝ ... վերապատրաստման դասընթաց չանցնելու հիմքով փաստաբանի նկատմամբ առաջին անգամ հարուցված կարգապահական վարույթը կարճվում է:

Որոշման 4-րդ կետով սահմանվել է, որ Որոշումը տարածվում է 2015 թվականի հունվարի 1-ից (Կարգն ուժի մեջ մտնելուց) հետո ծագած հարաբերությունների վրա (տրվում է հետադարձ ուժ):

Կարգի 30.<sup>3</sup> կետի համաձայն՝ նույն Կարգի 30.<sup>1</sup> կետով սահմանված արդյունությունից փաստաբանը կարող է օգտվել միայն մեկ անգամ:

Նշված նորմերի վերլուծությունից հետևում է, որ փաստաբանը պարտավոր է անցնել վերապատրաստման դասընթացներ, որոնք չեն կարող երկու տարվա ընթացքում քառասունութ ժամից պակաս լինել, իսկ Պալատի խորհուրդը, որպես գործադիր մարմին, սահմանում է փաստաբանների վերապատրաստման կարգը և ժամաքանակը: Սահմանված ժամկետում վերապատրաստման դասընթացներին չմասնակցելու համար փաստաբանը ենթակա է պատասխանատվության, բացառությամբ Կարգի 30.<sup>1</sup> և 30.<sup>3</sup> կետերով սահմանված դեպքերի, որոնց կիրառման համար անհրաժեշտ է հետևյալ պայմանների պարտադիր առկայությունը՝

- ✓ վերապատրաստման դասընթաց չանցնելու հիմքով փաստաբանի նկատմամբ կարգապահական վարույթը պետք է հարուցված լինի առաջին անգամ,
- ✓ վերապատրաստման դասընթաց չանցնելու հիմքով փաստաբանի նկատմամբ կարգապահական վարույթը պետք է հարուցված լինի 2015 թվականի հունվարի 1-ից հետո,
- ✓ կարգով սահմանված արտոնությունից փաստաբանը կարող է օգտվել միայն մեկ անգամ,
- ✓ փաստաբանը պետք է գրավոր դիմում (այդ թվում՝ էլեկտրոնային փոստի միջոցով) ներկայացնի Պալատին՝ պարտավորվելով հաշվետու կիսամյակում չանցած վերապատրաստման դասընթացների ժամերն իր հաշվին անցնել հաջորդ կիսամյակում:

Փաստաբան Արտավազդ Փարսադանյանի նկատմամբ սույն կարգապահական վարույթը հարուցվել է այն հիմքով, որ վերջինս՝ խախտելով Կարգի վերոնշյալ կանոնը, 2015թ. երկրորդ կիսամյակի (հուլիսից դեկտեմբեր (ներառյալ)) ընթացքում չի մասնակցել պարտադիր վերապատրաստման դասընթացներին:

Թեև Արտավազդ Փարսադանյանը 02.02.2016թ. դիմումով խնդրել է կարճել կարգապահական վարույթը, սակայն Պալատի ընդհանուր դեպարտամենտի ղեկավարի կողմից 09.03.2016թ. տրամադրված տեղեկանքից բխում է, որ Կարգի վերոնշյալ լրացումը կատարելուց հետո փաստաբան Արտավազդ Փարսադանյանի նկատմամբ վերապատրաստման դասընթացներին չմասնակցելու հիմքով մեկ անգամ արդեն կարգապահական վարույթ հարուցվել է և վերջինս օգտվել է Կարգով սահմանված արտոնությունից, ուստի սույն դեպքում Կարգի 30.<sup>1</sup> և 30.<sup>3</sup> կետերով սահմանված դրույթները կիրառելի չեն: Ինչ վերաբերում է դիմումում նշված այն հանգամանքին, որ իրեն չեն իրազեկել, որ դասընթացներին պետք է մասնակցել 6 ամսվա ընթացքում, ապա Կարգը, ինչպես նաև Որոշումն ընդունումից անմիջապես հետո հրապարակվել է [www.advocates.am](http://www.advocates.am) կայքում, միևնույն ժամանակ բոլոր փաստաբաններն իրազեկվել են էլեկտրոնային փոստի միջոցով:

Պալատի խորհուրդն արձանագրում է, որ 2015 թվականի հուլիս-դեկտեմբեր (ներառյալ) ամիսներին Պալատը կազմակերպել է **98 (իննսունութ)** վերապատրաստման դասընթաց (չհաշված առցանց վերապատրաստման դասընթացները), որոնք վարել են 49 դասավանդող, որոնցից՝ 24 փաստաբան, 3 դատավոր, 14 գիտնական և 5 միջազգային փորձագետ: Ընդ որում, թեմաները նախապես հաստատված և տեղադրված են եղել Պալատի կայքում, ինչպես նաև յուրաքանչյուր ամսվա դասացուցակները հաստատվել և տեղադրված են եղել Պալատի կայքում:

Խորհուրդն արձանագրում է, որ փաստաբան Արտավազդ Փարսադանյանն օբյեկտիվորեն ունեցել է հնարավորություն հաշվետու ժամանակահատվածում

անցնելու տվյալ կիսամյակի համար պարտադիր 12 (տասներկու) ժամ ժամաքանակով վերապատրաստման դասընթացները, սակայն չի կատարել օրենքով նախատեսված պարտականությունը, և խախտել է Օրենքի 19-րդ հոդվածի առաջին մասի 4.1 ենթակետի, 45.12-րդ հոդվածի 2-րդ մասի, Կանոնագրքի 2.8.2 ենթակետի և Կարգի 8-րդ կետի պահանջները:

Նման պայմաններում Պալատի խորհուրդը գտնում է, որ փաստաբան Արտավազդ Փարսադանյանն ենթակա է պատասխանատվության:

Խորհուրդը կարգապահական տույժ կիրառելիս հաշվի է առնում այն հանգամանքը, որ փաստաբան Արտավազդ Փարսադանյանը վերապատրաստման դասընթացներին չմասնակցելու համար առաջին անգամ է ենթարկվում պատասխանատվության:

Ելնելով վերոգրյալից, Պալատի խորհուրդը՝ ղեկավարվելով «Փաստաբանության մասին» ՀՀ օրենքի 10-րդ հոդվածի 5-րդ մասի 14-րդ կետի, 39-րդ հոդվածի 1-ին մասի, 39.7-րդ հոդվածի 5-րդ մասի 1-ին կետի, 39.9-րդ հոդվածի 1-ին մասի 1-ին կետի, «Հայաստանի Հանրապետության փաստաբանների պալատի կանոնադրության» 16.26-րդ կետի, «Փաստաբանի նկատմամբ կարգապահական վարույթի իրականացման» կարգի 30-րդ հոդվածի 5-րդ մասի 1-ին կետի պահանջներով, ինչպես նաև Կարգի պահանջներով,

### **Ո Ր Ո Շ Ե Ց՝**

**1. Փաստաբան Արտավազդ Փարսադանյանին (արտոնագիր թիվ 226) ճանաչել մեղավոր «Փաստաբանության մասին» ՀՀ օրենքի 19-րդ հոդվածի 1-ին մասի 4.1 ենթակետի, 45.12-րդ հոդվածի 2-րդ մասի և և Փաստաբանի վարքագծի կանոնագրքի 2.8.2 ենթակետի պահանջների խախտման համար:**

**2. Փաստաբան Արտավազդ Փարսադանյանի (արտոնագիր թիվ 226) նկատմամբ կիրառել կարգապահական տույժ՝ նկատողություն:**

**3. Հանձնարարել Պալատի աշխատակազմի ղեկավարին՝ սույն որոշման մասին իրազեկել փաստաբան Արտավազդ Փարսադանյանին:**

**Ծանոթություն.** Սույն որոշումը կարող է բողոքարկվել դատական կարգով՝ այն ստանալու օրվանից մեկամսյա ժամկետում: Սույն որոշումն օրինական ուժի մեջ է մտնում սույն կետով նախատեսված բողոքարկման ժամկետն անցնելուց հետո:

Հայաստանի Հանրապետության  
փաստաբանների պալատի խորհրդի  
կարգապահական գործով  
նիստը նախագահող՝

Նելլի Հարությունյան